



Dus Caduffs e dus Sursilvans: Cusseglie governativ Marcus Caduff e divisiunari Lucas Caduff (da dretg).



Ina da las mattinas en costum tradizional.



Cun in tren spezial èn ils giasts vegnids da Cuira a Poschiavo.

FOTOS G. N. STGIER



Las duas deputadas Silvia Casutt-Derungs (a san.) e Carmelia Maissen.

«Jau na vegn betg ad esser in arbiter»

Poschiavo: Festa per Alessandro Della Vedova

DA GION NUTEGN STGIER / ANR

■ Il nov president dal cussegl grond Alessandro Della Vedova è en l'istorgia dal parlament grischun il terz um da Poschiavo che stat al timon da quel gremi chantunal. El vegnia ad esser in pursura per l'entir Grischun e na be per las valladas talianas da noss chantun.

Diesch onns suenter la sessiun dal cussegl grond «extra muros» a Poschiavo è il parlament grischun, cun intginas excepziuns dals chatschaders, s'inscuntrà sonda a Poschiavo. La raschun è stada la festività per Alessandro Della Vedova, il nov president dal cussegl grond. La vischnanca è sa preschentada en vestgi da festa, gist sco tut ils giasts er. Embelli la festività han numerusas societads da la Val cun retschaiver cordialmain e cun blera color «il presidente del Gran Consiglio». Suenter l'arrivada cun il tren spezial da Cuira a Poschiavo è la raspada da festa marschada tras il vitg, e quai accompagnada da la «Filarmonia di Poschiavo», fin tar il lieu da festa a l'ur da la vischnanca. En la sala da la chasa da scola aveva il parlament grischun anc debattà il zercladur 2009, actualmain però fatg festa en onur da Della Vedova.

Per in di la chapitala grischuna

Beneventads èn ils giasts vegnids da Giovanni Jochum, il «podestà» da Poschiavo. El ha ditg che per in di saja Poschiavo la capitala dal chantun e quai saja plaschavel. Dapi ch'il Grischun haja in parlament hajan las Vals talianas gi fin ussa 11 presidents dal cussegl grond. Poschiavo sez haja gi cun Giacomo Beti il 1933 e Guido Cramer il 1958 be dus ed ussa cun Della Vedova il terz president che sa-



Cusseglie governativ Jon Domenic Parolini e sia dunna Susanna Fanzun.

ja per in onn il pli aut Grischun. Il president communal ha ditg che Poschiavo haja ina surfatscha da 190 meters quadrat e per far ina cumparaziun ha Jochum ditg ch'il Principadi da Liechtenstein haja be ina surfatscha da 160 meters quadrat, persuerter per in pau daplis daners che Poschiavo ch'haja cunzunt blera crappa.

La rivalitad Poschiavo – Brusio

Sco usità ha er Della Vedova retschet da la regenza las cornas da capricorn. Jon Domenic Parolini, il president da la regenza, ha ditg che quellas sappia il president dal cussegl grond adina puspè duvrar en il parlament sche deputadas e deputads sa cuntengian betg tenor protocol. Mussar las cornas a la regenza, quai dastga Della Vedova dentant betg, ha ditg Parolini cun in surrir. Menziunà ha el er la rivalitad tranter las duas vischnan-

cas Poschiavo e Brusio. Sch'il chantun Grischun haja en bun 30 onns be pli 30 vischnancas, tranter quellas sa chattian segir er Poschiavo e Brusio, omaduas vischnancas nua che la fusiun na saja strusch in tema.

In president per mintgin

Alessandro Della Vedova, el ch'ha 48 onns, ha davairas giudi la festa ed è sa mussà engraziavel envers tuts. El vegnia ad esser in president dal cussegl grond na be per las Vals talianas da noss chantun, mabain in president per tut la populaziun dal Grischun, gea, in president per mintgin. Segir na vegnia el er betg ad esser in arbiter. Ad intervegnir vegnia el là nua ch'i saja necessari, ha ditg il deputà da la pcd. El saja plitost qua per sustegnair la populaziun e per tgirar il contact cun quella, quai che saja da grond'impurtanza, ha punctuà Della Vedova.



Giovanni Jochum (a san.), il president communal da Poschiavo, cun Dumeni Columberg, l'antierur cusseglie nazional.



Da la partida a la festa: Barbara Gabrielli, Bernardo Lardi e Nicoletta Noi-Togni (da san.).



Tamburs durant il cortegi.



Han chantà cun il Chor dal cussegl grond: Andreas Thöny, Kevin Brunold e Christian Rathgeb (da san.).